



Naalackersuisut attartornermut peqqussutip allannguuteqartinnissaat, ineqarnermut akiliineq bankip qaamatini ulloq kingulleq ammaffianut nuunnissaanut aalajangiiffigisassatut siunnersuut.

(Inatsisartunut ilaasortaq Justus Hansen, Demokraatit)

Siunnersuuteqartoq isumaqatigaarput, periaatsit imminnut kipungasut aallaaviunerat patsisigalugu, inuiaqatigiit atugarisaannik kalluaasoqalersimappat taava inatsisinik nalimmassaanissaq pisariaqalersimassaaq.

Ukiuni kingullerni inigisaminniit anisitaasariaqartartut ajornartorsiutaajartuinnarnerat iliuuseqarfigineqartariaqarmat, kipungassutaasunik aaqqissuuisoqartariaqarpoq. Isumaqarpugut attartortitsisuniit aningaasarsisitsisartuniillu ajunngitsup tungaannut aallassutaasinnaasunik inissisimasoqartoq.

Inissianik attartortitsisut soorlu INI, innuttaasunik kiffartuusiffiupput pitsaanerpaamillu sullissinissamik pisussaaffeqarlutik. Sullitat ajornannginnerpaamik periarfissaqartinnissaat aallaavigalugu attartortitsisut periarfissiuusisartariaqarnerat siunertaasaaq. Nunarput sulisartorpassuaqarfiusoq aallaavigalugu, inissianik attartortitsisartut eqaatsumik suleriaaseqartariaqarnerat pisariaqarpoq. Sulisartorpassuit ullut 14-ikkaarlugit aningaasarsisartut, nalimmassaavigineqartariaqarput aamma ullut 14-kkaarlugit inigisaminnut akiliisalersinnaannerannik. Qarasaasiaqannginnerup nalaanni periaatsit taama ittut ingerlanneqartareersimammata naatsorsuutigaaarput ukiuni makkunani aamma sulit tamanna ingerlanneqarsinnaasimassasoq. Ilisimagaluarpaput nunani allani qaamatikkaartumik akiliisitsisarnerit kisimik atuutinneqartut, kisianni tamanna uniffiussanngilaq nunatsinni ajornartorsiutaasunik aaqqiinniarnitsinnut.

Nunatsinni ullut aningaasarsifiusartut qaqugu pisarnissaat assigiisarneqarsinnaasutut isigaarput, soorlu ullut 14-kkaarlugit aningaasarsisartut qaammatip ulluani uani aningaasarsisassasut aammalu qaamatikkaartumik aningaasarsitinneqartartut ullumi aamma aalajangersimasumi. Taava inissianut akiliisarnissat aaqqissuunneqassasapput ullunut aningaasarsiffiusartunut tulluurtumik.

Siunnersuuteqartup ajornartorsiut aaqqiivigineqartariaqartoq tikitaa, ataatsimiititaliamit susassaartumit suliarineqartariaqartutut isigaarput, qulaanilu tikitavut suliarinninnermi ilanngullugit nalilersorneqarnissaat kissaatigalugit.

Taama oqaaseqarluta siunnersuut ataatsimiititaliami susassaartumut ingerlateqqaarneqassasoq siunnersuutigaaarput.